



GRUPO MUNICIPAL

MARÍA DEL CARMEN MOREIRA MARTÍNEZ, Vicevoceira do Grupo Municipal MAREA PONTEVEDRA, recollendo unha proposta conxunta das confrarías de San Telmo, Raxó e Lourizán, presenta diante do Pleno do Concello de Pontevedra, para o seu debate e aprobación, se procede, a seguinte PROPOSICIÓN ao abeiro dos artigos 67, 117 e 118 do Regulamento Orgánico do Pleno e das súas Comisións, solicitando que **O CONCELLO INSTE Á XUNTA DE GALICIA A RETIRAR O ANTEPROXECTO DE LEI DE ACUICULTURA DE GALICIA.**

EXPOSICIÓN DE MOTIVOS:

O sector do mar de Galicia é estratéxico da nosa economía, polo emprego directo que xera. Mariscadoras a pé, bateeiros, mariñeiros ou mariscadores a flote constitúen un amplísimo colectivo que ten o seu medio de vida no mar. Con empregos estables, tamén en épocas de crise, porque están menos expostos ao ciclo económico -ao contrario do que acontece noutras actividades-, o sector do Mar representa o 4% da produción total da economía galega e dá traballo, directo ou indirecto, a miles de familias.

Tamén é un sector estratéxico na economía local polo emprego que induce en diversas actividades en terra:

-empresas destinatarias dos nosos produtos (depuradoras de moluscos, cocedoiros, conserveiras, centros de conxelación e pasteurización, procesadores, comercializadores).

-empresas provedoras de servizos e subministros (estaleiros, cordelerías, carpintería, montaxes e maquinaria).

-actividades auxiliares e de apoio (transportes, centros de investigación, formación e control do medio mariño).

A importancia económica do sector do mar únese ao valor social que adquire nos municipios costeiros, xa que ten a capacidade de irradiar beneficios socioeconómicos a amplas capas da poboación, o que o converte nun mecanismo de distribución e reparto de riqueza no entorno local que incentiva a implantación de actividades e pequenos negocios.

Asemade, ten unha enorme contribución cualitativa a un dos sectores que actualmente presenta un maior desenvolvemento económico: o turismo. O turismo en Galicia esta baseado en piares como a catedral compostelá, a etnografía, a paisaxe e a gastronomía.

É dicir, a fortaleza do sector en Galicia está tamén baseada na captura e extracción de peixes e mariscos aos que os consumidores lles outorgan alta estima e prestixio, pois forman parte fundamental da nosa cociña.

Ninguén dubida de que todos os negocios grandes e pequenos vinculados a actividade turística, directa ou indirectamente, deben boa parte do seu atractivo ao sector do mar.

Sobre o anteproxecto de Lei de Acuicultura de Galicia:

O 1 de outubro de 2015, o Consello da Xunta iniciou a tramitación do Anteproxecto de Lei de Acuicultura de Galicia, sen un diálogo previo cos sectores produtivos do mar. O 19 de outubro de 2015 saíu a exposición pública no Diario Oficial de Galicia polo prazo dun mes (ampliado, ante as protestas orixinadas, ata o 15 de decembro do 2015).

Este Anteproxecto de Lei de Acuicultura incorpora e dálle rango normativo de obrigado cumprimento á coñecida como ESGA (Estratexia Galega de Acuicultura) que, segundo propia definición, era un documento de estratexia e orientación política.

Entre outros elementos, o Anteproxecto de Lei de Acuicultura contempla:

- O Plan de Ordenación da Acuicultura Litoral en Terra, que establece
- que os propietarios de terras que se neguen a vender serán expropiados a favor das empresas de acuicultura intensiva,
- o privilexio de eliminar a necesidade de informe previo de incidencia ambiental e a posibilidade de instalar plantas acuícolas en espazos naturais protexidos
- a imposibilidade de que os Concellos poidan decidir sobre a implantación destas industrias, por seren consideradas de incidencia supramunicipal

O Plan de Ordenación de Cultivos Mariños, que establecerá para cada zona das Rías as especies a cultivar e o tipo de gaiola/batea a utilizar.

De se aprobar como Lei, consolida un trámite lexislativo fraudulento e un engano á cidadanía, aos administrados, e tería como principais perxudicados á toda a xente do mar.

Ás autorizacións de marisqueo que pasen a ser acuicultura outorgaráselle unha concesión temporal e -como o resto das concesións- quedan obrigadas a producir uns rendementos mínimos, terán de pagar os canons por superficie ocupada (con risco de viabilidade económica das confrarías) e terán que pasar as embarcacións á 4ª lista perdendo os *permex* doutras actividades, unha vía máis para a extinción da pesca tradicional e do marisqueo a pé ou a flote.

Todas as concesións, ao seu remate ou de non cumpriren os rendementos mínimos, sairán novamente a concurso público e serán concedidas con discriminación que favorece aos máis fortes, xa que obriga a competir á xente do mar contra multinacionais en criterios como maior solvencia económica, financeira e técnica.

Van privatizar o mar a favor das grandes empresas multinacionais.

A lei está deseñada para implantar a peixicultura intensiva a escala industrial e vai autorizar todo tipo de especies a cultivar, incluso foráneas ou exóticas, que poderían acabar sendo invasoras do medio natural.

Para a implantación da peixicultura intensiva, a Lei impulsa a Acuicultura Multitrófica Integrada-AMTI, técnica de cultivo que consiste nun monocultivo de peixe carnívoro

(salmón, etc) que utiliza especies extractoras (moluscos). Esta técnica busca reducir os niveis de contaminación xerados polas gaiolas de peixes co obxectivo de mellorar a súa imaxe pública na procura da aceptación pola sociedade e así, favorecer a súa implantación e a ocupación das augas das Rías.

Para garantir a implantación dos obxectivos da Lei establécese un réxime sancionador represivo e desproporcionado.

Por todo isto, Marea Pontevedra presenta a seguinte

PROPOSICIÓN:

- 1. Instar á Consellería do Mar á retirada do Anteproxecto de Lei de Acuicultura de Galicia e ao consello da Xunta de Galicia á apertura dun novo proceso de redacción da lei consensuado co sector.**

Pontevedra, 3.2.2016

A Vicevoceira do Grupo Municipal de Marea Pontevedra

MARÍA DEL CARMEN MOREIRA MARTÍNEZ